

岭
南
遗
书

嶺南遺書

廣州人物傳卷第十二

嶺南遺書

香山黃佐才伯撰

前翰林典籍孫公蕡

給事中王公佐

前翰林待制黃公哲

教諭李公德

贈監察御史趙公介

孫蕡字仲衍南海之平步人也性敏邁資表秀偉於書無所不讀爲詩文多不屬藁開卷伸紙立筆而就初若不甚經意而氣象雄渾興喻深致駸駸乎魏晉之風自少負節槩不妄交耕夫販婦望而目之曰孫先生元季避

亂山澤間東莞何真保有南海洪武改元戊申征南將軍平章廖永忠至真求贄作書請歸附曲盡誠款永忠不戮一人而南海帖然者贄之力也永忠尋徵贄典郡教三年庚戌始詔天下設科取士贄以詩經中高選會試中書入對大廷皆在前列賜進士出身授工部織染局使尋出主虹縣簿時經兵燹十室九空加意勞來民還其業甫一載被選入爲翰林典籍學士宋濂樂韶鳳承旨詹同亟稱許之日侍上左右奏對敏便而容觀飄逸濂輩皆自以爲莫及八年預脩洪武正韻九年以奉常之節監祀於西川居翰林三載力求補外爲平原簿無何以事逮繫有旨輸左校板築蕭牆望都門謳吟爲

粵聲督工者以聞召至上前陳所作詩皆忠愛語特命
釋之十一年罷歸田里放迹雲林中益肆力於問學所
見益深有輕死生齊物我之意嘗和陶潛歸去來辭以
寫其情其一曰懷靈荃志不忘君也十五年被召拜蘇
州府經歷蘇爲東吳劇郡素號難治蕢贊畫有方政用
大和二十二年以事謫戍遼東怡然就道酌酒賦詩無
異平日時都帥梅思祖節鎮三韓素聞蕢名迎置家塾
是年竟以黨禍見殺人皆勸其以疏自明蕢不答歌一
詩長嘯以就刑天下冤之年五十有六門人黎貞時亦
在戍奉柩葬於安山之陽蕢平生謨述甚富有通鑑前
編綱目七卷孝經集善一卷理學訓蒙一卷西庵集八

卷和陶集一卷集古句律詩一卷傳於學者孝經集善則宋濂爲之序焉蕢旣沒諸書多零落弗存其詩文今行世者爲黎貞所編番禺趙絢作蕢傳稱其究天人性命之理濂洛關閩之學爲嶺表儒宗官雖不甚顯而所至有聲出處窮達夷險一致云

用西庵集順德志參修

王佐字彥舉家世本河東元末侍父官南雄經亂不能返因奉母寓廣州改物後占籍南海時孫蕢與佐結詩社於南園開抗風軒以延一時名士佐才思雄渾體裁甚工蕢深重之構辭敏捷王不如孫句意沉著孫不如王會何眞開署求士與蕢首被禮聘眞敬二人者使掌書記軍旅事多見咨詢李質者德慶豪帥也據有肇慶佐

恐其有異志與蕢往說之得其歡心質遂與真通好然
質尤號好文義衣冠之士多往依之其尤知名者則有
江右伯顏子中茶陵劉三吾建安張智歸言於真使招
致之由此士皆館穀凡以一藝名者真不棄也洪武六
年部使者薦於朝謂佐有才學當備顧問徵至京師拜
給事中論思補闕恆稱上意學士宋濂嘗拜賜黃馬上
爲歌命諸詞臣和之佐斯須而就清新富贍如宿構者
有臣騎黃馬當赤心之句上覽之而喜賜鈔一錠上遊
幸或遇會心處多命之賦詩三吾嘗同詠署中桂驚其
才高語妙以爲名世之作其爲名流所重如此佐性不
樂樞要居官二載卽乞骸骨上憐其誠特俞所請陞辭

日賜鈔五十千以爲道路費士林羨之時天威嚴重臣僚自陳者多被譴斥蓋十人而九佐以恭愼得歸故當時以爲難云佐天性孝悌父沒時有廖元正者爲料理喪事殯諸南雄之五里山終身事元正如父旣貴後元正之子犯法言於有司以已貲贖其罪哀慕終身形於著述有聽雨軒集瀛洲集多散逸郡人彭森刻於建安者僅詩一卷評者比之高適岑參

用楊壽夫趙絢所撰集序參修

黃哲字庸之番禺人世爲荔灣著姓哲弱冠而孤刻苦讀書通五經嘗借人文選手鈔之沉玩究竟遂能作詩造晉唐奧域性好山水結廬蒲澗栖息其中往來羅浮峽山南華諸名勝自以爲未足乃辭家度庾嶺過吳楚遊

燕齊間一時湖海英豪皆與遊焉當風雪時泊舟秦淮
遇朱文昭涂穎輩相與握手吟咏沽酒大噱二人喈曰
君才如白雪吾雖知音如寡和何自是益有名龍鳳中
太祖爲吳王駐師金陵招徠名儒哲爲丞相李善長參
政張昶汪廣洋所知交薦之乙巳建吳國拜哲翰林待
制入書閣侍太子讀書尋兼翰林典籤輔導盡職太子
愛重之鈔幣之賜無虛日丙午六月左丞相徐達北伐
捷聞上命賦詩稱旨未幾歲早上祈雨鍾山獲應御製
七言詩志喜命哲賡之其見重如此洪武初奉使青徐
諭諸反側尋出知山東東阿縣蒞任勤於爲政吏胥初
以儒士易之哲剖決如流案牘無停者且不事繳繞苛

察民樂其寬一縣帖服值旱麥苗盡彫乃齋戒徒跣烈日中詣洪範池之龍祠禱焉詞旨哀惻甘澍應時優渥民驩呼曰此黃公雨也狼溪有怪物善爲幻能竊人啗之哲爲文禱於天須臾風雷大作一青蛟斃水上邑人訝以爲通神時經毛貴亂後民多流徙他邦聞哲善政復其業者亡慮數千人戶口日滋辛亥四月陞東平府通判東阿士民遮道涕泣攀畱父老扛輿而至有百餘歲者抵府境乃返是歲黃河決梁山中書省發民疏浚哲董東平之役經畫有方民不告勞聞有司欲復堰黃陵岡哲建議謂此乃胡元之覆轍可以爲戒不可以爲法事遂寢尋上疏陳時務數十事皆人所難言上怒其

狂斐會山東分省奏哲捐俸修先聖祠築積水湖堤有
成績上乃釋不問哲亦乞歸得允旣南還有司請哲領
郡校事橫經授徒四方至者多名士歲凡數百人乙卯
四月朝廷取回山東治在郡詿誤竟置於法郡邑人爭
賄之且家爲奠祭哲始北上時倚篷聽雪常自詫曰天
下奇音妙韻出自然者莫是過也歸構一軒名聽雪篷
學者稱曰雪篷先生子德輿輯其詩文十餘卷號雪篷
集行於世嘗經梁昭明太子墓作詩弔之評者謂置選
詩中殆不可甲乙其精工如此

用琴軒集雪
篷集參修

李德字仲修番禺人博覽羣籍工文詞尤邃於經學明毛
詩尙書洪武庚戌以明尙書薦至京師上親策問賜徐

大全等出身有差德預焉授洛陽縣典史繼遷濟南西
安二郡幕非其好也政暇遍覽帝王遺墟登高作賦發
其胸中磊落之氣人爭傳誦嘗著論謂西安南陽皆天
下大形勝所在建不拔之基者當擇而都之江東非其
匹也士林韙其識歷職郡邑十餘年年薄暮矣乃自陳
不能吏願就教官得爲湖廣漢陽教諭當兵革初靜蠻
舍翳蓬蒿中生徒僅十數輩皆野獷不可與語德盡心
訓迪之言諸有司羅致民間子弟之俊穎者館穀焉自
是絃誦誦詵人知向學矣秩滿改任廣西義寧縣學其
俗尤陋德立法凡遇家有吉凶事當告假者隨貧富以
楮幣賙之孜孜勤諭使約束鄉鄰不得爲惡習俗日美

科貢漸盛當道方薦達之而德以倦遊南歸卒於家德
爲詩多效長吉太白孫贊笑之曰子真混元皇帝遠孫
也德乃力追古作有易庵集行於時序者以爲跨晉唐
而躐宋元云少嘗自號采真子著論如子書晚更潛心
伊洛故世稱有理學者必曰李長史子孚字底信亦能

詩

用廣州志文翰類選
大成易庵集參修

趙介字伯貞番禺人博通六籍雖星官醫卜之說浮屠老
子之書靡所不究氣宇豪邁與物無芥蒞興到卽揮毫
賦詩人莫測其涯也父璟元臨江路治中與母連喪介
孤憤閉戶讀書遂無復仕進意植二松於所居扁其軒
曰臨清蓋以淵明白儼昭其志云時有李韡者南海文

士也以薦起介力止之不可臨別介泣謂曰堯天雖長
劉日實短子獨不爲高堂念乎讎竟去後倅南康坐累
乃歎曰趙伯貞真高士也介行嘗以一囊自隨遇景卽
投詩其中絕不爲人畱題縉紳恆病其狷性復不喜接
達官貴人日往還西樵泉石間獨與八十翁劉樂善者
相倡和以自娛屢爲有司所薦皆苦辭免洪武己巳以
家累有旨逮赴京師道南昌卒於舟中年四十六介顏
如渥丹丰度類神仙中人尤善教子四子絜絢繹純皆
善詩文工篆隸時稱四懷絢亦隱居有父風所謂趙懷
絜者也後純貴贈介爲監察御史有臨清集行於世方
孫蕢王佐結詩社南園時一時名士如李德黃哲暨別

駕黃楚金徵士蔡養晦黃希貢長史黃希文架閣蒲子
文進士黃原善趙安中安中之弟通判澄徵士訥皆與
焉豪吟劇飲更唱迭和文士宗之而介自成一家言世
以蕢佐德哲並之稱五先生云李韓字或華與介齊名
有夷白集而今不傳

用五先生集趙氏家譜陳璉所撰碑參修

廣州人物傳卷第十二

官吏自是而全不

正失其意

以費於營建並之

無益於國增其

安撫十之

臨廣城金

廣州人物傳卷第十三

嶺南遺書

香山黃佐才伯撰

秫坡先生黎公貞

教授廖公謹

吏部主事鄧公林

樂澹先生唐公豫

學圃先生黃公勤

刑部郎中黃公裳

教諭黎公秉繩

黎貞字彥晦新會人性坦蕩不羈樂以酒自放故號陶陶生晚更號秫坡學者稱之曰秫坡先生貞自少岐嶷異